

11/12/1997

26 ketua negara hadir di sidang OIC

Roslan Hamid in Teheran

TEHERAN, Rabu - Datuk Seri Dr Mahathir Mohamad berkata, beliau gembira dengan penyertaan ramai ketua negara dan kerajaan di Sidang Kemuncak Kelapan Pertubuhan Persidangan Islam (OIC) yang bermula di sini, semalam.

Sidang kemuncak tiga hari dan terakhir pada abad ini, menarik kehadiran 26 ketua negara dan kerajaan daripada 55 negara anggota OIC, menunjukkan kejayaan tuan rumah, Iran mengendalikannya.

Menurut Perdana Menteri, kehadiran ramai pemimpin Islam menolak tanggapan negatif sesetengah pihak mengenai Iran.

"Iran bersikap sederhana dan tidak cuba menggunakan forum ini untuk menyerang sesiapa," katanya kepada wartawan Malaysia di rumah penginapan rasminya, di sini malam tadi.

Perdana Menteri berada di Teheran menghadiri Sidang Kemuncak Kelapan OIC selama tiga hari yang bermula semalam.

Dr Mahathir berkata, langkah Iran menjadi pengerusi yang berkecuali adalah satu langkah baik.

Semalam, selain menghadiri majlis perasmian sidang dan menyampaikan ucapan, Perdana Menteri turut mengadakan pertemuan dua hala dengan Presiden Iran, Mohamad Khatami yang juga Pengerusi Sidang Kemuncak Kelapan OIC.

Mengenai pertemuan itu, Dr Mahathir berkata Presiden Iran itu menyatakan hasrat mengeratkan lagi hubungan dengan Malaysia bukan saja di bidang agama, tetapi juga ekonomi dan pendidikan.

Dr Mahathir berkata Iran melalui perubahan beransur-ansur dan negara ini kini bukan saja mengambil berat mengenai kerohanian tetapi juga dari segi ekonomi, politik dan sosial.

"Ia tidak terlalu menekankan cara-cara yang mengasingkan mereka daripada orang Islam lain dan menjadikan mereka bermusuhan dengan orang bukan Islam," kata Perdana Menteri.

Dr Mahathir berkata, perkara ini jelas seperti dalam ucapan perasmian sidang OIC semalam, pemimpin tertinggi Iran, Ayatollah Ali Khomeini, berpendirian lebih liberal dan saksama.

"Ini kerana dia sebut juga masalah orang Iraq yang menjadi musuhnya dan masalah lain secara berkecuali. Dia tidak bawa masalah sendiri dan permusuhan dalam ucapannya," katanya.

(END)